

欽定大清會典事例

欽定大清會典事例卷三百六十八

禮部

學校 學政關防

學政關防。○順治初年定。提學經臨地方。巡捕官董率兵快於交界處防護。

敕印。其餘夫馬案臨伺候。不得別批迎接。官吏師生。不許出郭迎送。吏書乘馬。自行上下。貼轎近行。馬夫先送雨具。不得近前。兵快執肅靜牌於執事前。迴避牌於吏書前。如遇紆途曲巷。有潛行探聽。乘機餽送吏書者。先行拏究。有容令跪道。

投書稟見者。巡捕員役重究。該巡捕官不許代替。如違提究。○又定案臨下馬。執事卷損暫止大門外。俟輿夫出。守門官吏暫閉大門。學政先入。安置印匣。巡捕官入後堂。周視各房牆垣。封鎖書吏。出堂。巡捕官同押損官驗交卷損。次早隸繳執事。次地方官送聽事員役及柴燭等項。驛官送廩給鋪陳。總具一冊。巡捕官按檢畢。乃收入學政更衣升堂。守門吏啟門。各官吏師生序進。逐起稟見。遞一應文冊畢。各回不再見。巡捕官率兵快晝夜巡邏。但有沿牆窺竇拋擲。

凡及行走蹤迹可疑者。即拏送究。新到星相醫卜面生之人。驅逐不容留住。如違。巡捕官責治。地方歇家鄰佑連坐。案臨次日。祇謁。

先師。官吏師生禮生止於廟一揖。不稟接。行禮畢。升明倫堂。官生以次揖見。應坐者照憲綱序坐。講書生員總出一班。一揖。西嚮立。講畢。以次下堂。東嚮立。俟行賞罰畢。官吏師生先出不赴謝。每日辰時投文。申時領文。守門吏領出印信號簿二。一登記發行公文。一遇各衙門遞到公文。先檢無磨洗拆動夾帶私書等弊。方許登記。詳驗。

批文各幾角幾件。巡捕官印驗訖二字。付原役投入。解審補考批銷。各隨牌入鋪遞公文。亦照前登記。每日門吏各註姓名以備稽查。如員役刁難需索。許稟拏問。其考試問卷之日。一應公文皆巡捕官驗送駐紮州縣登簿收存。每一日總為一束。候發落完彙冊送進。有批迴者。該衙門徑註收發批。候發落完日彙送一應書札。徑自阻回。有緊急事務。傳鼓稟入。非緊急事不得傳鼓。○九年題准。學政須正己潔操。矢公矢慎。務得真才。不許曲徇情面。生員有荒疏庸耄者。

即行黜退。有捏造流言。思逞報復者。訪實照例
問遣。若鄉宦勢豪。干託不遂。暗行中傷者。許徑
自奏叅處治。○又奏准。學政巡試各府州。務親
臨徧蒞。不許於隔別府分調取生儒。以致跋涉
為累。不許令師生匍匐迎送。考畢。即於本地方
發落。明示賞罰。不許攜帶文卷於別處發案。致
令吏書乘間作弊。士子無所勸懲。違者題叅。○
又題准。學政奉

敕專督學校。督撫布按兩司。不許侵其職掌。學政巡
試所屬。除教官生員干犯行止合行嚴懲外。不

許泛受民辭。侵官喜事。其生員犯罪。或事須對理者。聽該管衙門提問。不許徇庇。致令有所倚恃。抗拒公法。○十一年覆准。新授學政一經領敕。次日即行赴任。如有逗遛都中。赴席燕會者。許科道官指名叅處。至於各省舊任學臣。考試已竣。均於十一月內報滿到部。如違定限。題叅議處。○康熙十八年議准。向來歲科兩考。積弊有十。童生未經府考。冊內無名。鑽求學政。徑取入學。巧圖捷便。一弊也。考試各府州縣衛所童生。額外溢取。撥發別學。明收冒籍。以占本學正額。二

弊也。彌封編號印簿。及場內坐號紅簿。不發該府州縣封存。私留本署。暗對字號賄賣。三弊也。考完一府。不將紅案速行發學。任意遲延。徇私通賄。更改等第。拔下作上。四弊也。每考一處。令書辦承差快手人等出入過付。暗訪生員有家資者。先開六等草單。嚇詐保等出銀。准入三等。五弊也。文童額少。武童額多。將文童充為武童。入學之後。夤緣改文。倡優奴隸。濫行收取。實能騎射者。擯而不錄。六弊也。各府地方設立考場。憚於親臨。將生童遠調考試。各州縣告病生員。

損擡驗病。困苦難堪。七弊也。縱容無賴教官。包攬生童。私通綫索。效勞分潤。名曰作興。大壞風教。八弊也。曲徇上司。同僚情面。並京官鄉宦私書。及親戚朋友。隨住地方。討情抽豐。孤寒之士。棄而不錄。九弊也。報部學冊。將額外溢取入學童生。未經歲科兩考。豫附三等。其姓名不入新案。造入衣頂下。以趙甲頂錢乙。作為實在之數。蒙混禮部。十弊也。嗣後學道考覈。均註剔除十弊。不能剔除十弊。該督撫即指叅。內有貪贓之弊。照例革職提問。如無貪贓等事。照才力不及。

例降二級調用。其考覈疏內不註剔除十弊字樣及未曾剔除而註剔除者。或吏部查出。或科道糾叅。督撫照不報劣員例降三級調用。督撫有需索陋規者。亦照貪贓例處分。至上司同僚京官鄉宦私書。及親戚朋友隨住地方討情抽豐。並州縣官傳遞私書。鄉紳投刺請席者。係官革職。係常人交刑部從重治罪。至順天學院任滿時。亦開明剔除十弊。具題考覈。方准回院。各省皆改學院。任滿皆自題十弊剔除。若不能剔除。或有貪贓等弊。亦照學道例處分。○二十一年覈准嗣後學政

凡到所考地方。量撥別縣書吏供事。其掌案長接名色。嚴行禁革。屬官一概不許迎接。執事員役不許退堂傳遞關節。如遇校閱之日。一概封筒不許傳入。閒有公事。俟試竣之日。方許開函遞進。其生童試卷。府縣除正卷外。不許多備一卷。如有此等情弊。聽該督撫據實指名題參。交部從重議處。如該督撫徇情。被科道官糾參。或旁人出首。將督撫一併議處。○二十二年覆准學政有將祠生贊禮濫行批設。考試生童徇私賄錄。至於劣衿學霸包攬武斷者。不行究斥。行

誼修明者。不為表揚。統令該督撫題參。交部從重議處。如督撫徇私事發。一併議處。○三十九年議准。學政考試。督撫藩臬各道勒索陋規。及學政濫與者。皆革職提問。如有勢宦京官請託投札。及教官巡捕進士舉人說情。並書吏卑役等討賞等事。有官職者。革職。無官職者。從重治罪。若學臣徇情市恩者。亦革職一併提問。知府如有包攬入學童生。要挾勒索。將文理不通之童生送考者。或學臣申報。或督撫糾參。將知府革職提問。學政與提調。知府扶同作弊者。一併

革職提問。督撫不糾叅。學政不申報者。皆革職。
○又覆准。督撫如有藉名開送童生者。照勒索
棚規例治罪。州縣官賄薦案首。及各官效勞分
肥。提鎮等官說情。並學臣扶同者。事發皆照例
治罪。遇有挾制干請者。准徑實封奏。

聞。若祖父兄弟為子孫營謀者。除本童責革外。祖父
兄弟有官者革職。無官者從重治罪。○雍正二
年議准。考試文武童生。照定額取進。覆試之後。
即行出案發落。不得於本地少取。俟發紅案時。
復將別處添入。以滋弊端。○又議准。各省學臣

務恪遵定例。秉公考校。分別等第。以示鼓勵。毋得過寬徇私。其或有州縣人文果盛。確無荒謬不通之卷。亦不必苛刻推求。故列後等。以示無私。○五年議准。嗣後歲科兩試。學政務將未取之卷。批出不取緣由。交與教官。聽各該童自行領閱。○又覆准。嗣後學政所帶吏役。酌量足用。不許冗濫。至承差號吏。亦封在場內。不許容留一人在外。所有一應收發公文。催買供應等項。悉委提調料理。如有吏役在外招搖撞騙。詐提調。即行鎖拏。從重治罪。○又

諭學政一官。責任甚重。向來學政恣行貪劣。此固本人之不肖。而亦大半由於提調官員贊成之也。提調與學政相為表裏。嗣後學政聲名不好。應將提調官一併議處。其如何定例之處。著九卿會議具奏。欽此。遵旨議定。嗣後提調官如聽學臣貪冒通同作弊。以及引誘為非者。一經發覺。將提調官照貪官例。同學政一併革職。提問。如學政暗收關節。私鬻名器。提調官雖無通同引誘情弊。而防範不嚴。即照溺職例。革職。再學政按郡考試。凡應用員役。皆由提調官送用。嗣後如有猾吏姦胥。招搖撞騙。

及受賄傳遞等弊。提調官不訪拏查究別經發覺。將提調官照失察衙役犯贓例議處。儻學臣操守清廉。杜絕情弊。提調不得逐其引誘。反行挾制把持者。准學政指叅。審實。將提調官照貪官例治罪。○十年覆准。嗣後順天學政考試地方冊送之卑役。在堂上伺候者。不必點用。亦不必收地方供給。至於場外合用巡邏捺檢等項人役。仍照舊例。由地方官撥用。學政所帶隨行人役。既令場內辦事。務宜嚴加約束。不許擅自出入。與生童交通語言。仍令提調官查驗封鎖。

不時稽查。○又議准舊例學政案臨次日祇謁先師畢。即詣明倫堂講書。嗣因官吏師生參謁恐滋弊竇。改俟入場事竣再行詣學講書。但考試既畢。人數無多。聽講者寥寥。嗣後仍照舊例。於案臨次日詣學行香。即行講書。○十二年覆准。各直省學政職司文衡。試卷繁多。不能不延請宿學之士。寄以衡鑒。乃學政中每有希圖簡便。即以此府考居前列之生。帶至彼府閱卷者。其中瞻顧鄉曲。勢必暗通關節。廣徇情面。兼之書役勾連傳遞消息。夤緣說合。招搖撞騙等弊。皆不

能免嗣後各直省學政考試於未入境之先即延請他省中學問優長操守廉潔之士同往閱卷如係兩省接壤之地亦必在五百里之外者方准延請兼令該督撫嚴飭地方官並儒學教官通行曉諭嚴禁士子鑽營隨任妄希衡丈如該學政仍蹈前轍即行題叅議處並將同往之生斥革○又奉

旨學政科場乃國家興賢育才之要政關係甚為重大十餘年來各省試官不聞有婪贓敗檢之劣員朕心頗喜以為試事漸次肅清今觀俞鴻圖納賄營私受

一
一
賊累萬則各省之學政果否澄清。朕皆不敢深信矣。蓋學政與督撫同在一省。學政之優劣。督撫未有不深知者。止因督撫有所請託分肥。必致瞻顧情面。而代為隱瞞。朕復何從而知之。俞鴻圖之貪婪藐法。非遇秉公持正之王士俊。未必即行參奏。又如昔年張廷璐在河南學政時。柔善沽名。非遇田文鏡亦豈肯據實奏聞。比時朕將張廷璐調回。切加訓飭。今復用往江蘇。則非昔日之可比也。向使天下督撫皆如高其倬之存心為人。則不公不法之學臣。無人檢束。何所忌憚之有。嗣後朕止得留心體察矣。各省若有考

試不公徇情貪賄者。經朕查訪。除將學臣從重治罪外。該督撫必以溺職罪嚴加處分。不以尋常失於覺察論。可諭直省督撫知之。○又議准。嗣後斥革之貢監劣生。不得冒給衣頂。如有夤緣給衣頂者。一經發覺。除本生從重治罪外。將該學政一併嚴加議處。○乾隆四年

諭各省學政考試生童。為士子進身之始。甚有關繫。為學臣者固當各矢公慎。嚴密關防。而在外棍徒撞騙之弊。地方官尤宜嚴密訪查。以期肅清。近江西巡撫陳宏謀奏稱。江西積棍。每年尾隨學臣按試各郡。假

冒學臣親戚内幕。哄誘士民。營求入學。講定謝儀若干兩。一同包封。仍存士民之手。俟案出有名。方來取銀。營求之人。見其不先取銀。以為有益無損。遂將銀兩付伊。包封畫押。棍徒豫用錢文。假作銀封。臨時同夥設計。掩飾調換。攜銀潛逃。名曰掉包。迨至案出。無名。士民啟視銀封。方知墮計。而棍徒早已遠颺。在被騙者。既不敢鳴官。以取累。又不敢告人。以貽羞。遂致此風各處多有。不能杜絕。朕思一省若是。他省亦相同。著各督撫等。於學臣按試之前。將此等掉包串騙之弊。詳明曉諭。凡有指稱營求考取。將銀封貯出案。

收取者。無論真假。立即嚴拏究處。並許被騙之人。報官查拏。則應考生童識破機關。自不致墮其術中。而棍徒知有法紀。亦不敢公行無忌。亦肅清學政之一端。該部即遵諭行。○又議准。考試武童騎射。定例學臣會同武職校閱。武職奉委。若不迴避關防。不肖士子鑽營賄囑。亦未可定。嗣後武職奉委之日。封門迴避。提調官留心訪察。不得與本地人士私相往來。以及家人兵目。徑行出入。○六年奏。嗣後各省學政眷屬。概不准其隨帶。奉

旨。如學臣差滿之後。復留原任。或調別省。欲攜帶家眷

者。著本人自行具奏。○七年覆准。各省學政。守一定之儀制。勵師表之風裁。不得自損名節。取悅督撫。於相見之禮。不遵會典儀節。諂屈過甚。或至投拜門下。卑同屬吏。不得因觀風所取之生童。府州縣錄送之首名。不問優劣。徇情拔取。至督撫於學政。當以公正廉明相勸。不得以勢位意氣相陵。○又

諭學臣之廉潔貪汙。視乎其人之自主。初不在眷屬之有無。如謂攜眷即滋弊竇。則外省督撫藩臬以下。又何嘗不攜眷屬耶。即使不准攜眷。而隨任之家人幕

容又豈能保其一一奉法惟謹耶。嗣後不必禁止。○
八年議准。監射武臣。毋庸一體闕防。○十一年
覆准。學政案臨之日。飭令提調官將掉包誑騙
情弊。詳明曉諭。俾應試生童識破機關。不致墮
其術中。並於庵觀寺院等處嚴行訪緝。如遇面
生可疑之人。即行驅逐。提調官不行查拏。別經
發覺。照巡緝官失於查察例。罰俸一年。○十二
年覆准。學政闕防考試。如有暗通關節。弊生於
內者。責之學政。招搖撞騙。弊生於外者。責之提
調官。一經發覺。各照例處分。○又議准。嗣後學

政按試各郡。考畢之後。將拜望鄉紳親故之習。概行禁止。○十五年

諭四川總督策楞查奏朱荃賣書漁利。勒索告病告頂生員銀兩。並自奏平時未能覺察。請交部嚴加議處等語。朱荃蔑倫匿喪。據報失足落水。朕知其必有營私舞弊之處。嚴諭究查。策楞始將前後婪取贓款覆究。但未究明賄賣生員實蹟。據湖廣總督永興等。審據朱荃家人供賣生童九名。又收受李為棟銀兩。貂套等物。即將李姓童生二名。並取入學。贓私累累。策楞何以全無知覺於事先。並未究出於事後。從前學

政多簠簋不飭。後經責成督撫不時稽查。一經彈劾審實。即按律正法。其風始戢。近來漸有顧惜情面之意。並不實在留心體訪。以致學政等無所忌憚。故習復萌。竟敢公行賄賣。不法已極。此風漸不可長。策楞身在地方。朱荃所為狼藉如此。本俟定案時。嚴治策楞失察之咎。今即自行檢舉。若因此即稍為寬宥。益無以為督撫查察不實之戒。除現今該部嚴察議奏外。所有朱荃之弟及伊家人俱解交該督。並案內賄賣生童及經手說合各犯。逐一秉公嚴審。嗣後督撫於地方學政。如不時加確查。據實叅奏。經朕訪聞。或

臣工奏劾。必將該督撫嚴行議處。斷不姑容。○十七

年

諭。本日勾到情實官犯。內李為棟王瑞霖二犯。因賄囑朱荃為伊子營求入學。本按以財營求與受財人同科。問擬絞候。已屬該部輕為出脫。至策楞擬以緩決。更屬沽名曲庇。著交部嚴察議奏。蓋入學乃士子進身初步。原與科場一律。營求賄囑之風。斷不可不嚴為防範。在輦轂之下。糾察嚴密。易於敗露。至各省學政出京赴任。途次接見官員。乘便密行賄託。其事甚易。孰從稽查。似此情罪昭著。犯證確鑿之案。若不明

正典刑。將來玩法之徒。益無忌憚。且今歲科場。挖出關節。既伏厥辜。至殿試策名大典。復有豫擬策條。懷挾應試者。條對策問。若僅完卷塞責。較之三場。乃甚易之事。尚需宿構懷挾。則其鄉會中式之時。舞弊。不問可知。朕特未加深究耳。可見衣冠中不少敗類。實出尋常意計之表。敗類者如此。其儼幸入彀者。益難信其必無矣。比聞新進翰林輩。視交通關節。竟不以為惡習可恥。偷為一切。真才益淪。力挽頽風。朕不辭也。此而可寬明刑弼教之意。安在。李為棟王瑞霖二犯。已於秋決。內予勾正法。並將此嚴切曉諭中外。知

之。○十九年議准。各省學政宜約束幕賓親友胥吏家人。懍遵法度。以絕藉口造言之端。至於頂冒槍手。招搖影射。妄傳綫索。顯造飛語。匿名揭帖等事。學政一有見聞。即嚴飭提調官訪拏。提調官容隱。據實叅處。若提調藉無根之言。挾制學政。一經陳奏。督撫審實。從重治罪。儻學政苟且自全。別經發覺。除提調官治罪外。將學政一併嚴加議處。○二十五年議准。提調等官所司考務。如有胥役招搖傳遞諸弊。將失察之提調官及該管官。照失察衙役犯贓例議處。其場外平

民生童人等。有撞騙招搖。不行查拏。及徇隱姑容等弊。提調免其議處。失察之地方官。照失於查察例。分別罰俸降調。至提調與地方官果能實力查拏。將案犯全行拏獲。量行議敘。以示鼓勵。○二十八年覆准。嗣後各省學政案臨各府考試。如遇與該府係屬戚族。臨期改委該府之同知通判辦理提調事務。其直隸州設有考棚。即酌委州屬知縣一員提調。凡知府直隸州知州。均毋庸迴避。○二十九年議准。學政閱卷之時。其童生從前筆迹。一概不得寓目。至府州縣

考原卷。定例止解提調。不解學政。止送取中之卷。不解全卷。具有深意。若恐府州縣解送原卷。或有臨期抽換之弊。但須責成提調官嚴加查察。自可剔除。嗣後各府州縣於學政案臨之日。即將原取真卷解送提調官。如有遲誤。指名叅處。○三十二年議准。學政衙門書吏。按照定額八名召募。充當應役。五年役滿另募接充。仍將現役姓名年貌籍貫三代。及著役日期。備造清冊。取具該衙門並無違礙印結。於每年歲底咨報吏部查覈。○五十一年

諭朕恭閱

聖祖仁皇帝實錄。其時學政往往有蕩檢踰閑。賄賣生童之事。俱經身罹重辟。雍正年間。俞鴻圖復效尤舞弊。賕私累累。我

皇考將伊立行正法。以昭炯戒。乾隆年間。山西學政喀爾欽。賄賣生童。亦盡法懲治。自此人知畏懼。迄今數十年。從無有此。亂法之事。學政簡任衡文。果能砥礪廉隅。矢公矢慎。為國家鑒拔真才。不致貪黷敗檢。干犯憲典。固屬甚善。但恐日久因循。其中或有見利忘義之徒。故智復萌。不自檢束。亦未可定。著通行飭諭。

凡得膺衡丈之責者。當念為國樹人之義。秉公取士。同深儆懍。時時觸目儆心。不負任使。以前事為鑒。儻有仍蹈故轍。以身試法者。一經發覺。憲典具在。斷不肯姑為寬貸。毋謂朕言之不豫也。○五十三年

諭。各省學政俱有衡丈取士之責。近日風氣波靡。皆因應生童試時。不能端本所致。著通行嚴飭各學政。俾各加猛省。如有營私舞弊。賄賣生童者。一經敗露。朕惟執法從事。刑茲無赦。並交各該督撫嚴行查訪。如有前項情弊。立即據實嚴叅究辦。○又

諭。據大學士九卿等議。覆御史施朝幹條奏申嚴學政

考取拔貢事宜一摺。已依議行矣。至摺內稱各該督撫隨時稽查。如陽奉陰違。即將該學政叅處等語。學政按考各屬地方。俱係督撫所轄。如果該學政有考試不公。賄賣生童等事。各督撫耳目甚近。自無難訪查得實。前經降旨通諭各督撫。令將學政中之貪汙者據實指叅。但外省習氣。往往有官官相護之見。督撫等即明知學政聲名狼藉。仍不肯據實叅奏。若非瞻顧情面。扶同徇隱。必係各督撫等在任有貪劣款蹟。恐被學政訐發其私。遂爾意存顧忌。不敢列入彈章。二者必居一於此。方今綱紀肅清。督撫等俱受朕

厚恩。簡畀封圻重任。自應潔己奉公。以為通省官員表率。何至尚有敗檢營私之處。慮人指摘。惟是督撫中公正自持者。固不乏人。或竟有操守平常。轉被學政挾持其短。遂不得不聯為一氣。互相彌縫。或惟知瞻徇私情。罔顧公義。於各省吏治學校。甚有關繫。嗣後各督撫。惟當益勵廉隅。正己率屬。設遇學政有貪汙實蹟。即應指名糾參。若仍事徇隱。緘默不言。或別經發覺。除將該學政照例治罪外。必將該督撫一例從重問擬。決不姑貸。並令督撫於年終將學政等有無劣蹟。陳奏一次。若至別處發覺。則此不舉之督撫。

當得何罪。著自審。非朕不教也。○又

諭本年三四月間。因諸生條奏科場弊竇。曾令大學士九卿議奏。並降旨通行飭諭矣。彼時據阿桂奏外間傳有謝墉抽身便討吳玉綸倒口即吞之語。朕即以阿桂若僅奏謝墉聲譽不好。伊二人前在吏部時。原有齟齬。而吳玉綸則並無芥蒂。則其言似非無據。即他臣雖未明言其輿論平常。而伊二人之在學差任內。不孚衆情之處。聞知者亦復不少。學政為掄才所關。既聞有舞弊營私情事。安可置之不辨。隨降旨令李侍堯閔鶚元各將謝墉吳玉綸在任聲名究竟如

何之處就近訪查據實具奏。旋據閔鶚元奏。謝墉初任江蘇學政。聲名實屬平常。其復任時。尚知悔過。頗為謹飭。而李侍堯則稱吳玉綸在學政任內。聲名狼藉。至今閩省士子。猶懷忿恨。上年因吳玉綸條奏科場。該省之人。無不傳為笑柄。以吳玉綸即係作弊之人。如何亦說防弊。但事隔年久。實無憑據等語。適吳玉綸在熱河扈從。隨面加詢問。據稱伊曾條奏西監應行補捐一事。是以為衆所怨。昨謝墉帶領引見。來至熱河。亦面加詢問。據奏伊因考試過嚴。未免取怨於人。及詰以因何有抽身倒口之語。伊二人則皆奏

係寄園寄所寄小說所載陳言。想係怨之者因而附會等語。辨理科場本當嚴密。如果恪遵成法。自矢潔清。士心正當翕服。即或有被遺之人。為之散播謠言。亦何至憎茲多口。至吳玉綸條奏捐監。係四十六年之事。而其簡放福建學政。已在四十八年以後。相隔甚久。尤為兩不相涉。若云出自寄園寄所寄。則古今書籍所載陳言甚多。何以不取而附會他人。獨於謝墉吳玉綸二人曲加附會。不謀而合。但此事既經閔鶚元李侍堯就近查奏。並非無因。即將伊二人革職。交刑部審訊治罪。亦不為過。姑念阿桂所奏。究係傳

聞且無人不知。而李侍堯等亦因事隔年久。查無確據。朕從來不為己甚。何必遽興大獄。但伊二人俱係大員。經朕特簡學政。乃聲名至此平常。朕甚愧焉。謝墉吳王綸何以得勝卿貳之任。均著降調。為內閣學士。其職不過專司批本。並無應辦緊要之件。伊二人學問尚可。是以特予從寬降補。此皆朕格外矜全。伊二人務當痛自愧悔。勉為湔濯。如再不知悛改。必加倍重治其罪。各直省學政。如有關節賄賣等情。督撫近在同省。斷無不知之理。雖前已有旨。交該督撫等嚴行查訪具奏。或有學政舞弊營私。本省督撫知而

不舉。必係督撫自己廉隅不謹。恐為所訐。若該督撫等竟敢與學政通同一氣。作姦犯科。尚復何事。不可為。然督撫等俱受朕厚恩。特加委任。或不肖如王賈望。陳輝祖。郝碩。國泰者。賊私累累。於學政弊竇。自不敢舉發。而王賈望等俱已先後敗露。立置重典。亦不藉學政之叅奏也。但外省官官相護。惡習牢不可破。今屢經降旨通飭。各該督撫等務宜實力查察。如學政等有仍前情弊。立即嚴叅究辦。儻有心徇隱。必將該督撫一併從重治罪。決不姑貸。至士子等應試時。原不能無所去取。其中者自必感激無言。而被遺者

不免心存缺望。悠悠之口。固不足憑。但考官學政等。果能秉公錄取。毫無弊竇。公論具在。斷不致如謝墉等之衆口一詞。貽譏謗牘。嗣後各該學政亦當益矢冰兢。公平校閱。毋滋物議。務拔真才。以副朕訓誨成全之至意。○又議准。嗣後提調教官。如有應稟學政事宜。俱令公同當堂面議。不准一人私謁。違者聽該學政參處。仍令各該督撫隨時稽查。如陽奉陰違者。將該學政參處。○五十四年

諭。前因寶光鼎前來行在。謝恩召見。詢及各省學政居官如何。據稱上江學政徐立綱。人品聲名。俱甚平常。

隨降旨密詢書麟陳用敷。令其將徐立綱兩任在安徽考試情形。有無貪劣實蹟。據實查奏。茲據該督撫先後覆奏。徐立綱前任安徽學政。聲名實屬平常。但無確實劣迹。自復任以來。考選尚知謹慎等語。各省學政。如果冰兢自矢。校閱公平。何至衆口一詞。不孚物議。上年因謝墉吳玉綸在學政任內。聲名不好。曾將伊二人降調。以示懲儆。徐立綱以編修微員。經朕簡用學政。更當如何感激。益勵潔清。乃竟不知自愛。致有廉隅不謹之處。現在雖無確據。但似此聲名狼藉。其何以勝校士掄才之任。徐立綱著來京以司務。

博士等官降補。在武英殿修書處效力行走。○又諭前聞廣西學政御史潘曾起聲名平常。降旨詢問孫永清。令將潘曾起在廣西考試情形。有無劣迹據實查奏。茲據孫永清覆奏。潘曾起輕喜易怒。性情不好。未能滿愜士心。曾飭各府提調官密行訪查。雖無舞弊營私實蹟。而其聲名實屬平常等語。潘曾起屢經簡用學政。如果潔清自矢。訓迪有方。何至士心不服。乃竟不知自檢。士論紛然。現在雖查無確據。但聲名物議如此。豈可復勝臺諫之任。潘曾起著交部嚴加議處。○嘉慶四年

諭。據宋澍奏拏獲圖謀作弊之劣生。並叅任意疏縱之知縣一摺。此案山東沂州府報劣生員潘朝齡。既經宋澍拘禁押送回籍。該犯仍敢潛回三原。圖謀作弊。復經宋澍拏獲。交三原縣知縣任天桂審辦。該縣並未迅速嚴究實情。轉致潘朝齡脫逃。學政考試各處理宜嚴肅。提調於稽查防弊。尤其專責。乃劣生潘朝齡。於宋澍未到之先。已在三原潛住。該縣並未覺察。及經拏獲發審。又復任意耽延疏玩。致令逃逸。該縣亦係籍隸山東。或竟不免有與潘朝齡通同舞弊。並受賄故縱之事。三原縣知縣任天桂。即著革職。交與

馬慧裕會同學政宋澍先行嚴訊。其在逃之劣生潘朝齡並著馬慧裕飭屬嚴拏務獲一併嚴審定擬具奏。○又

諭吳省蘭奏考試寶慶府時接蘇州府總捕同知李焜稟帖一封。內有夾單開列伊胞姪李馥元童生李德元李體元之名。託其教誨等語。學政考試時例應關防。以杜囑託夤緣之事。李焜身係職官。罔知例禁。竟敢將伊姪李馥元等之名具稟學政。託其教誨。顯有請囑情弊。不可不嚴行懲辦。且李焜前在蘇州總捕任內審理生員馬照等一案。任情妄拏多人。看管馬

房。無辜諸生俱被控累。以致衆怨沸騰。經王德等審明。將李焜擬發軍臺效力贖罪。彼時因其掌責生員係在已經詳革之後。且訊無受賄情事。其咎止於粗暴孟浪。故加恩免其發往軍臺。降補知縣。是李焜本以陵辱斯文獲咎。而今又欲使子姪濫廁士林。以致敗露。可見天理昭彰。絲毫不爽。不知懼者非人類矣。此事若李焜用賄向學政營求。必當嚴審定罪。今雖空言請託。亦難輕貸。著岳起傳旨。將李焜革職解京。照前案原擬罪名。發往軍臺效力贖罪。用昭炯戒。至伊姪生員李馥元。童生李德元。李體元。遠在原籍。均

不知情。著免其斥革扣考。吳省蘭於按臨醴陵時。仍當憑文去取。不必稍存成見。吳省蘭接到李煜稟函。即行據實具奏。甚屬公正。著交部議敘。○二十四年諭。府縣試考取案首。原不應一概取進。其捐資辦公之士子。尤不應以考試為獎勵之途。著通諭各省學政。考試童生。惟當憑文藝之優劣。以定去取。其府州縣所錄案首。一律公平校閱。不得瞻徇情面。濫行拔取。至士子等捐資修葺儒學書院。其姓名概不准報知學政。如有府縣官違例干求者。該學政即指名叅奏。以杜倖進而勵士風。○道光四年

諭毛式郇奏選拔屆期請飭禁積弊一摺。各學選拔貢生。為掄才鉅典。前經通諭各直省學政。務選經明行修之士。以副旁求。然遴拔真才。必先剔除積弊。茲據毛式郇奏稱。訪聞直隸省每遇選拔之年。各學學書門斗。各府州縣書吏。及學政衙門書吏門丁。均有卷費冊費各項陋規名目。似此藉端需索。殊干例禁。且選拔試卷。例不糊名。當該學政局門校閱之時。尤難保無不肖之徒。在外招搖撞騙。不可不嚴行申禁。著直隸總督。即通飭各府州縣。及充當提調各員。於科試選拔時。認真嚴密查訪。如有匪徒在該地方招搖

撞騙。立即嚴拏按律懲辦。其卷冊考費及一切陋規著概行禁革。並著該督出示曉諭各屬。應試拔貢生員。僅仍有書斗門丁等需索抑勒情事。准該生赴提調官衙門稟訴。從重懲治。以肅關防而慎登進。毋得視為具文。○八年

諭。江西學政福申。於家人蕭三種。種種恣橫。藐玩漫無覺察。以致物議沸騰。被人叅劾。昨據陳若霖等查辦奏到。業經降旨將福申交部嚴加議處。直省學政聲名。該督撫向於年終出具考語。密行陳奏。遇有不公不法。及輿論未協者。即應據實直陳。豈容稍有隱飾。乃

琦善韓文綺具奏學政福申聲名摺內均稱其場規嚴肅關防慎密並無弊竇可見該督撫蹈官官相護之陋習視為具文徒以一奏塞責韓文綺近在同城見聞自確乃並不留心查察其各較重著交部議處琦善駐紮江南相隔稍遠著交部察議嗣後各該督撫於該學政務當隨時留心查覈於年終出具考語秉公據實不可稍有含混經此次訓諭之後儻仍相率緘默不肯直陳或別經發覺或被人糾叅必將該督撫重懲不貸。○又

諭吏部議將福申照縱容家人長隨招搖詐騙例革職

福申到任兩年有餘。屢經出棚考試。於蕭三到處詐索。肆行無忌。斷不能諉為不知。豈失察可比。福申著即照部議革職。○十二年

諭朕聞江西學政鄭瑞玉不協輿情。降旨令周之琦認真訪查。覈實叅奏。茲據奏稱該學政將亂號生員鎖發提調訊究。係屬照例辦理。惟場規不能嚴肅。致書吏將不應進署之人混行帶入。並令官親查號。及覆試點名遲至巳午。均屬違例等語。該學政職司考校。自宜整肅場規。嚴防弊竇。乃不能約束官親書吏。覆試士子。任意遲延。致滋物議。豈能勝學政之任。鄭瑞

王著交部議處。即來京聽候部議。○十五年

諭御史陳功奏請飭各直省學政嚴肅闕防以除積習。一摺。學政有振興文教之責。考試嚴肅。則衆論允孚。去取公平。則人心翕服。必須諸弊肅清。真才乃出。不特家丁幕友防範宜嚴。且士習文風。關係綦重。稍有不慎。則倖進者遂其夤緣。而實學因之淪棄。各直省設立學政。經朕特加簡用。每遇歲科考試。為士子進身之階。宜如何矢慎矢公。以期無忝厥職。若如該御史所奏。學政所到之省。世交舊好。求情請託。其府州縣所錄案首。及考取前列。該學政周全情面。遷就取

進等語。積習相沿。此等弊竇。不能保其必無。不可不力加剔除。著通諭各直省學政。嗣後於案臨考試。務須滌慮洗心。嚴密闕防。破除情面。即有世交舊好。與試膠庠。俱宜覈實秉公。不得徇私以圖見好。儻有廣通聲援。託故私謁。斷不准附會取進。以杜干請而絕夤緣。其府州縣所錄案首及前列各卷。一例公平校閱。不得瞻徇情面。濫行拔取。如有府州縣各官違例干求者。該學政即指飭嚴叅。儻該學政不能正己律人。有意徇情。經朕訪聞。或別經發覺。必將執法嚴懲。決不寬貸。懍之慎之。○又

辭學政延請本籍幕友。原屬例所不禁。本日據鄂山將四川學政王篤閱丈幕友姓名籍貫。照例開單呈覽。朕詳加披閱。該學政幕友六人。均係陝西籍貫。而籍隸韓城者居其五。實向來所未有。學政有教育人材之責。校閱自當公明。而防弊尤須周密。若幕友盡係同鄉。不但易滋物議。設遇有通同舞弊情事。稽查更恐難周。不可不防其漸。著王篤即將現在幕友酌量更易數人。並隨時嚴加查察。以肅關防。嗣後各直省學政。務擇品學兼優之士。襄校文字。不得專用本籍之人。致滋流弊。○十六年

諭上年因四川學政王篤聞文幕友六人。均係陝西籍。貫。曾經降旨令該學政酌量更易數人。以肅關防。並通諭各直省學政。嗣後不得專用本籍之人。致滋流弊。該督撫學政等。自當共見共聞。恪加遵守。本日據梁章鉅將廣西學政丁善慶幕友姓名籍貫。照例開單呈覽。該學政幕友五人。均係湖南籍貫。前降諭旨甚明。該學政豈未之見耶。丁善慶著交部議處。仍著更易數人。以肅關防。○又

諭湖南學政龔維琳於門丁顧四到處批斥需索。毫無覺察。並將自作詩賦刊刻板片。存留書鋪。任其刷印。

售賣。實屬溺職卑鄙。著照部議革職。○又

諭。吳文鎔奏。選拔屆期。請嚴禁弊端。一摺。直隸省每遇選拔之年。各學學書門斗。各府州縣書吏。及學政衙門書吏門丁。均有卷費冊費各項陋規名目。且當學政局門校閱之時。更有不肖之徒。在外招搖撞騙。不可不嚴行飭禁。現屆丁酉科選拔之期。所有學政衙門書吏家丁。著責成該學政。嚴為稽查。加意約束。並先期剴切出示申明例禁。至局門校閱時。著直隸總督通飭所屬各府州縣。及充當提調各員。認真嚴密查訪。如有匪徒在外招搖撞騙。立即嚴拏按律懲辦。

其卷冊考費一切陋規。著概行禁革。並著該督出示曉諭各屬。應試選拔生員。儻仍有書斗門丁等需索抑勒情事。准該生赴提調官衙門稟訴。從重懲治。各直省考試拔貢。俱著照此辦理。經此諄諭之後。各該學政衙門書吏人等。如仍有需索陋規情弊。惟該學政是問。至局門校閱時。該提調官不能隨時查察。杜絕弊源。致不肖匪徒。仍敢在外招搖撞騙。一經發覺。定將該提調官懲處不貸。○又覆准。考試坐號底簿。照例封交提調。不准學政自收。致啟查閱營私之弊。○咸豐十一年覆准。嗣後各生童情殷助

餉報捐各項官階俱呈明地方官轉詳督撫覈
辦不得在學政衙門呈報以肅關防

欽定大清會典事例卷三百六十九

禮部

學校

學政供給

教職考覈

學政供給。順治初年定。提學經臨地方。程途非六十里。不得備辦中火。有驛州縣及非宿站。不得別送下程。又定。案臨初到日。照常送米麪一次。以後發簿照數辦送。各該調考州縣不許別送下程。如久住之所。柴炭油燭及門早柴米。均酌定數目。五日一送。筆墨紙張。候票取方送。送進物件。巡捕官按檢。如遇考校日期。生儒

供給。先一日送進。每名大餅六枚。水果四枚。夏月加西瓜。即置考案上。教官仍給飯一餐。務精潔堪用。有以惡濫冒費官錢。該吏坐贓問罪。各員役供給。亦先日豫備。各州縣同日考者。先期扣算。合用銀若干。會同總辦。以免偏累。事畢。通前公費。及一應修理衙門。置辦器皿。給賞花紅。紙筆之費。一併造冊。各具總散數目若干。候起馬日呈報。以憑查覈。○康熙二十一年覆准。向來考試地方。各州縣官指稱供給名色。私派甚多。或按丁徵收。或逐戶科斂。每考一府。費民間

數千餘金。嗣後應嚴行禁革。如有私派照舊累民者。許督撫指叅。交部從重議處。○雍正十一年覆准。從前府州縣院考書吏人等辦事。需一月有餘。雜費不入正項奏銷之內。皆取給於卷價。而該管官遂招立卷戶。平居衙署之糊飾。臨時所送識認之試卷。皆索之卷戶。於是明索高價。苦累生童。嗣後府州縣以及院試。無論大中小學。每本試卷定價三分。令該提調官自行置辦。不許再招卷戶。其紙價公費之外。即為辦事書吏人等飯食之費。若再立卷戶。照例叅處。○

乾隆元年

諭各省學政有衡文育才之責。關係綦重。從前各賞養廉。資其用度。俾得堅持操守。砥礪廉隅。衡鑒公明。共襄國家作人之鉅典。天下人文繁盛。應試衆多者。莫如江南。而江南學政養廉。江蘇二千兩。安徽一千五百兩。較他省為少。以致養贍家口。延致幕客。未免不敷。所當加恩體恤。著從今秋為始。上下兩江學政。養廉各賞銀四千兩。使伊等用度從容。益得盡心於職業。以副朕任官課士之至意。○二年

諭安徽應試童生。有完納卷價之陋例。其費彙交知府

直隸州知州。除修葺考場外。其餘則補學政養廉之不足。雖每童所出。不過錢數十文。而在貧寒書生。亦不免拮据之苦。且學政養廉。朕已特頒諭旨加增。更不必取資於卷價。至於修葺考場。乃地方公事。應動存公銀兩。著將生童交納卷價。永行禁止。毋使不肖官員及吏胥人等。藉名苛索。致滋擾累。○十一年覆准。湖南童生應試。悉令自行買卷投交。其提調官所收價三分。照安徽之例。永行禁革。如遇修理考棚。亦照安徽之例。於存公銀內動給。至各省學政案臨初到之日。豫計考期遠近。日用薪

疏數目。酌發價銀。交提調官委人辦送。不得收取供應。沿途護送人夫住宿處所。以及考棚應用什物。勢難自備。仍令地方官遵照向例辦理。其從前所定卷價三分。除紙張工價外。所餘原屬無多。惟是官辦卷價已經革除。應嚴加禁約。毋得令吏胥人等。借報名收卷造冊等名色。仍行需索。令各該學政不時查察。以防弊端。○又

諭

學政考試卷價。自雍正十一年經部議定。每本價值三分。令提調官自行置辦。不許卷戶仍前增價重戥等弊。自應遵照定例辦理。今江蘇等屬卷價浮多。有

貴至一錢及二三錢不等。寒士未免拮据。此皆由書役舞弊。仍係該管官不行查察之所致。著該督撫學政等通行各屬。嗣後童生府州縣以及院試卷價。令依部定之例。毋得違例多取。如有仍蹈前轍者。著該督撫查出。分別究治。○二十二年定。向例各省學政俱頒發學政全書各一部。嗣後各學政一體於交代冊內轉相交代。如果年久損壞。不堪應用。報部補行頒給。○二十三年議准。學政歲科二試。律詩選用詩韻。照鄉會試刊刻韻紙之例。豫行刊刻小板。俟案臨時發提調官印刷。先期繳

署。出題時每人給以片紙。其板仍留為考試別屬之用。刊刻印刷之費。即於辦公卷價內支除。○三十一年議准。學政赴任回京。及調他省。仍照舊例辦理外。如有升調別省他職。一概停給夫馬船隻。先將勘合繳部。然後起程。仍令各督撫嚴行查察。儻學政有例外多索等弊。即指名參奏。毋得瞻徇情面。稍為容隱。○三十二年議准。學政事宜。禮部隨時遵行。其續增學政全書。統以十年為期。刊刻分發各學政。實力奉行。○

三十三年

諭鄂寶查奏梅立本按試各屬較前任學政通計多用夫七百名。又粵西各屬每棚另有捐項銀六十兩。為書役飯食。現在籌酌間款另行妥議等語。學政按試衡文。應輕騎減從。不可絲毫擾累地方。即例有案臨夫馬之說。止為護送敕印及必應隨帶之文卷官物而設。為數亦屬無多。且各省學政原與養廉。其隨帶之行李及幕友家人所用夫馬。理應自備。豈可借卷箱之名。濫行需索。若一切應用夫馬仍取給有司。則各省督撫等養廉甚厚。豈遇有公事巡行各屬。亦皆令屬員供應夫馬耶。各督撫未免存官官相護之見。

不肯查辦。縱容日久。遂至積習相沿。著通諭各督撫。查明各該學政按試時。有無擅動驛馬多少若何。及似梅立本之多人夫者。或間有自行雇覓之處。並各學政養廉若干。現在情形若何。即行據實具奏。到日再降諭旨。至於學政書役。各有例給工食。其飯食豈可令地方官捐備。亦屬非體。並令該督撫一併查明覆奏。欽此。遵

旨議定。向例學政赴任。兵部按照品級給予勘合。沿途地方官照數供應夫馬。至學政在任案臨各棚考試。有護送

敕印兵丁馬匹。損擡文冊卷箱人夫。其餘隨帶鋪陳。及家人幕友一應夫馬船隻。例應自行發價雇覓。並無地方官供應之條。今據各督撫覆奏直隸等十四省。向係學政照例自備。惟廣西湖南雲南貴州四省。官為供應。實屬積習相沿。應嚴行禁止。一體責令自行發價雇用。至各省護送敕印損擡文卷官物夫馬船隻。向無一定數目。易啟濫索濫應之弊。嗣後學政考竣一府。即將無關緊要文卷封交提調。徑送學政衙門。其必應隨帶文卷冊箱。用夫十二名。護送

敕印。用馬四匹。水路備船一隻。如路徑崎嶇。應加夫四名。水路或遇險灘之處。加小船二隻。以為定制。俱在驛站夫馬船隻內撥給報銷。此外有濫索濫應。並短發價值。及給價之後。州縣繳回學政收受者。該督撫查出。據實叅奏。如督撫徇情不舉。別經發覺。一併嚴加議處。至各省考棚一切應用官備之物。及學政衙門額設書役例給工食。原應酌動公項。不得令地方官再行捐備。至學政養廉。各省酌定原額多寡不等。除直隸江蘇安徽陝西山東山西福建雲南原定四千

兩。湖南原定三千六百兩。均毋庸另議增減外。其河南省原定六千六百六十六兩零。為數過多。廣東原定四千五百兩。浙江原定二千五百兩。加以學租餘贍銀一千七百餘兩不等。共計銀四千二百餘兩。亦屬較多。均以四千兩為額。三省共酌減銀三千三百六十六兩零。其江西原定二千四百兩。四川原定三千兩。貴州原定二千七百兩。湖北原定三千兩。俱著增至三千二百兩。尚餘銀一百六十餘兩。至奉天府丞兼管學政。原定養廉四百兩。即以此項餘贍銀兩

給奉天府丞以資辦公。○嘉慶四年

諭。昨有人條奏。貴州學政向來取進童生。例繳紅案銀兩。三兩八兩不等。後則愈加愈多。廩保書役藉端需索。送至五六十兩等語。因令軍機大臣傳詢差滿貴州學政談祖綬。據稱各省學政俱有棚規。一切書役飯食及硃價卷價棚廠等費。皆取於此。惟貴州並無棚規。向於童生取進後。令出紅案銀兩。每名自一二兩至五六兩。作為出考費用。談祖綬按試各府時。亦相沿辦理。但止令量力繳進。從無多至三四十兩之事。此等棚規紅案銀兩。原係相沿陋規。貴州學政養

廉本少。距京較遠。學政攜其家屬。延請幕友。前赴任所。需費自不免稍多。而該省並無棚規。出考一切費用。令新進生童量為致送。其事亦尚在情理之中。即各省學政亦係陋習相循。貼補考費。非私賣秀才可比。若將棚規紅案銀兩概行裁革。則學政辦公竭蹶。豈轉令其錄取不公。營私納賄。況各省地方官所得各項陋規。不一而足。尚難一一禁止。乃獨於讀書寒賤出身膺衡文之任者。過事掇求刻覈。亦殊屬無謂。惟此項紅案銀兩。止應令取進童生量力交送。總不得過五六兩之數。其實在無力者。亦當量為減免。不

得強令交納。在學政既可從容辦公。而新進寒微。亦
可共邀體恤。儻該學政等於陋規外復加多索。甚或
於校士時有翫法婪贓之事。則必重治其罪。不稍寬
貸也。○又

諭前因學政得有棚規紅案銀兩。相沿已久。業經降旨
明白曉諭。並學政等不得於規外多索矣。今又有人
條陳。恐有創立新條。致滋科斂一摺。既有此奏。著再
通諭各省學政。務須潔清自矢。秉公校閱。不得藉有
應得分例。任意加增。儻有賄賣生童及翫法婪贓之
事。定當從重治罪。不稍寬貸。○五年

諭上年因貴州學政養廉本少。該省距京較遠。學政延請幕友。需費稍多。該省舊有紅案陋規銀兩。以資用度。曾降諭旨予以限制。不得過五六兩之數。其實在無力者。即當減免。不得強令交納。今思此項紅案銀兩。究係陋規。學政本不應得受。雖今予以限制。但既有此名目。難保日久不又逐漸加增。上年所降諭旨。係朕一時思慮未能周備。該省學政養廉本係三千二百兩。著該撫於貴州省藩庫閒款內加恩酌增五百兩。俾資辦公。此後該省紅案陋規銀兩。著永行禁止。不得收受分文。至其餘各省學政例給養廉。本屬

數用。其向無紅案陋規者。自不得違例索取。若向有此項陋規。俱著一體飭禁。儻有仍前私受者。一經查出。或被糾察。必將該學政按律治罪。○光緒四年議准。嗣後奉天學政。歲科兩試。案臨吉林。所有應用人夫尖宿處所。暨採買食物草料等項。仍令吉林廳照章代辦。以肅關防。至吉林紳捐生息銀二千五百兩。系奏明作為辦考費用。仍照向章統發提調官吉林廳掣節辦理。○六年諭。嗣後奉天學政。前往吉林考試。所有動用之項。務當力求撙節。不得逾奏定數目。其所餘紳捐生息

銀二千二百兩。即作為書院經費。

教職考覈。○順治九年題准。儒學教官。士子觀法所繫。提學案臨之日。考其學行兼優。教有成效者。除禮待獎勵外。仍據實列薦。其行履無過。但學問疏淺者。姑行戒飭。責令勉進。有老病不堪者。准令以禮致仕。若鑽營委署。橫索束脩。卑汙無恥。素行不謹者。即行叅奏。分別究革。其有學霸生員。書役門斗。行私惑誘者。一併究擬重治。○十三年題准。提學嚴考教官。除文行兼優。及文平而行無虧者。分別應薦。應留外。其文行

俱劣者。開送撫按題參罷黜。○康熙十八年題
准。學政於官員賢否。遵照

敕諭。例應考覈。文到各府州縣掌印官。照舊式備造
僚屬履歷。及以前薦獎戒飭緣由。填註考語事
實。教官更分年力志行學識教規四款。內有賢
不肖之尤者。別具揭帖。限一月內送閱。案臨再
造新任及改節改過者。季冬續報。並將任內作
興學校事蹟。備申報奪。儒學掌印官。若遇有升
選及會試等事故。提調即以年深訓導委署。一
學皆缺。即將別學附近者詳委。凡經手書籍器

物學糧文卷交盤明白。申報批允方許離任。如
應聘及丁憂等項。查無違礙。即日申報。各州縣
署印。毋得轉委教官。即承乏委用。亦須申詳學
政批允方行。止守倉庫。毋干別事。各府州縣禮
房吏及學吏轉考。候詳允方准起用。違者究革。
○二十七年定。武生無武學處。照例屬文學教
官管理。其降黜劣行等事。悉照文生例行。○三
十九年議准。學臣有考試教官之例。責令學臣
實力奉行。如全無文理者。即行題參。○四十三
年

諭。教官必文學明通。方稱厥職。近見直省教職官內。不
諳文學者甚多。如此何以訓士。著行文直省巡撫。將
各屬教官通行考試。分別具題。欽此。遵

旨議定。嗣後教職由部選後。赴撫臣考試。其考居一二
三四等。令其赴任。五等令歸學習。六等革職。○
五十年覆准。教官計典。分別優劣。必由學政。嗣
後直省如係學道。令會同藩臬考覈。送督撫具
題。如係學院。藩臬二司造送督撫學院。會同考
覈具題。○雍正元年

諭。直隸各省教官。乃專教士子之人。今准捐納。以致不

通文理少年。反為學問優長年高齒長之師可乎。應照其品級別任補用。該部議奏。欽此。遵

旨議定。嗣後直隸各省教職。除正途照舊選用外。其捐納教諭訓導。即用先用之人。不由舉人恩拔副榜廩生揆貢出身。由生員捐納貢生者。教諭以縣丞改用。訓導以主簿改用。照捐納日期。入於各項捐納班內銓用。○二年覆准。現任教職內。由捐納出身者。既令改補別任。嗣後專令正途出身之教授教諭學正訓導。設立課程。實心教習。如有抑勒孤寒等弊。該學政題參處分。其教

習著有成效者。即行題薦。○又覆准。教職由廩生捐納出身者。仍許留任。○又定。禁止各學教官。率領文武生員迎送官司。○三年

諭。凡遇地方賑貸之時。著該督撫學政。飭令教官將貧生名籍開送。地方官覈實詳報。視人數多寡。即於存公項內量撥銀米。移交教官均勻散給。資其體粥。如教官開報不實。給散不均。及為吏胥中飽者。交督撫學政稽察。即以不職叅治。○四年

諭。凡縣令改授教職者。因其不勝牧民之任。例當罷黜。念其讀書攻苦。選授一官。不忍遽令廢棄。是以改為

教職。俾居師儒之席。以展其所學。此朕格外之恩也。况教官有化導士子之責。較理民之任。關係尤重。伊等自當殫心竭力。以盡職守。儻因改授教職之故。志氣墮頽。諸凡怠忽。著各學政查叅。從重議處。○又覆准。嗣後撫臣考校教官。居三等者。仍照例給憑赴任。四五等者。悉令解任學習。三年再行考試。六等者革職。至錢糧詞訟二項。係州縣專責。教官未定考成。但該教官果能訓誨約束。則士習漸端。自無抗糧興訟等弊。嗣後各學教官所屬文武生員。除受誣被告及實有冤抑。切已不得

已之事。申訴控理外。其有倚恃衣頂抗欠錢糧。並捏詞生事。唆訟陷人等事。該教官即申詳督撫學臣。免其叅處。如縱容徇庇。不行申報者。事發。將該教官題叅。照溺職例革職。如該教官果能盡心訓導。六年之內。所屬士子無前項過犯。該督撫學政據實保題。以應升之官。即用。其現任之員。以雍正五年為始。扣滿六年。著有成效者。一例保題。○又覆准。順天府學設立滿洲教授訓導。令其每月將八旗生員考試一次。並以時教令騎射。如有文理不通。行止不端者。該教

官申詳學政。即行革退。如該教官怠惰廢弛。有玷厥職。許順天學政指名題參。○又覆准。外省府州縣衛。以儒學教官兼理武學。京衛大興。宛平二縣武生。亦令儒學教官訓誨約束。裁汰原設武學官役。其現任武學教授訓導。令離任照原品別用。○又覆准。凡計典教官賢否。皆由知府具報。嗣後各省督撫轉飭各府。從公考覈。如有姑息容隱。將各該知府照徇庇例題參議處。

○七年

諭。嗣後教官沽名邀譽。縱容方生不舉報者。經學臣指

參將教官照溺職例革職。若學臣瞻徇情面不行糾
參者。將學臣照徇庇例降調。永著為例。○又議准。教
官之職。專司訓迪士子。除錢糧折封。比較生員
拖欠錢糧。並州縣會審案件有關戒飭生員之
處。仍令赴州縣衙門公同辦理外。其一切地方
事務。均不得干預。儻州縣不遵定例。仍傳教官
同辦地方事務。教官違例前往干預者。州縣官
照將事務交與不應交之人例議處。教官照不
應得為之例分別議處。○又定。各學教官所屬
文武生員貢監。有窩匪抗糧。捏詞生事。唆訟陷

人減倫悖理者。該教官即行通詳。免其議處。若被府州縣訪出及他人首告。審實不准補揭。正副教官並革職。如府州縣於劣生事發之後。令教官補開詳揭者。降三級調用。若教官有受賄徇隱及藉端勒索諸弊。仍革職究擬。府州縣不行申報者。亦照徇庇例議處。○十三年議定。京府教授。四氏學教授。各府衛儒學教授。為正七品官。各州學正。各縣教諭。為正八品官。各府州縣衛訓導。為從八品官。○乾隆元年

諭。教職乃師儒之官。有督課士子之責。素蒙

皇考世宗憲皇帝加恩優待。屢次訓勉。且與有司一體賞給封典。朕即位以來。念其官職卑微。恐以冗散自居。不思殫心盡職。特加品級以鼓勵之。按舊例教職兩官同食一俸。未免不敷養廉。著從乾隆元年春季為始。各照品級給予全俸。永著為例。三年覆准。教官為多士之楷模。宜潔清自愛。不得因循舊習。令吏胥門斗索取生員贄見節儀。至舉報優劣。乃甄別大典。如有冤濫於士習關繫匪輕。嗣後各省教官。有仍前勒索贄見規禮。以致舉報優劣不公者。令督撫學政覈實嚴參。照藉師生名

色私相餽送例革職。儻別經發覺。將督撫學政照例議處。書役鬥家人有索詐等事。究明本官是否知情。分別照例議處。書役鬥家人按律以枉法論。計贓分別治罪。○六年

諭古者黨有庠。術有序。民生八歲入小學。十五入大學。不獨秀而為士者。羣生樂業。天下實無不教之民。是以教化興而風俗厚。後世設立教官。專以課士。已非先王有教無類之意。而近來教職多係衰老庸劣之輩。不但不能以道德禮義化導齊民。並其課士之職亦不克舉。則安用此官為也。朕御極之初。念其薄俸

不足自贍。特命增給。乃望其修舉職業。助興教化。非以廩餼為養老之具。各教職亦不當以司鐸為養老之官也。著該督撫會同學政嚴飭所屬教官。務以實心實力。勸學興文。恪盡課士之責。其有年力衰頹及庸劣不稱師儒之席者。秉公甄別。咨部罷斥。庶訓迪得人。而於造士育才之道。實有裨益。各督撫學政仍當時刻留心。永久奉行。不可苟且塞責。○又議准。嗣後凡各學正副教官離任時。俱照州縣官例。將曾奉頒發存儲書籍器物一切經手學田租穀之項。造冊出結。交與接任之員。查明接受。造冊

出結。由該府縣覈明加結詳司。轉送督撫學臣存案。仍將交明緣由報部。儻離任之員。有心隱匿者。查明題叅。缺失者責令賠補。若接任之員不行查明。混出冊結接受。即由接受之員暨加結之府州縣賠還。逾限交代不清。亦照州縣官例。咨叅議處。○又覆准。報官交代之例。原指新舊接卸而言。至本學正副署攝者。該員原係經管之人。毋庸造冊交代。○七年議准。各省學臣考試教官時。與尋常考試一體封門。不許攜卷歸寓。以杜代倩。並分別等次移明督撫。以為大

計考覈之實據。十年

諭教職為司鐸之官。訓課士子。長養人才。是其專責。乃向來循例銓授。未加別擇。以致衰老龍鍾庸劣荒疏之人。濫居師儒之席者。不可勝數。此中外所共知共見。是以去年朕命廷議。古人原有七十致仕之義。現任教職年至七十以上者。令其休致之處。曾經通行。上年湖北巡撫晏斯盛。以歲貢年已七十。應否扣選一事。摺奏請旨。時朕復思古來申公伏生。老而傳經。人之可用與否。未可專以年齒論。譬如年逾七十而強健者。亦不可銓選乎。未至七十而病憊龍鍾者。亦

可姑容乎。惟當看其人之可用與否。以為去取。不當以七十為限。總在該督撫學政秉公實心辦理。庶有裨益。已將此意明白批諭。今伊又復具奏。內稱每科鄉試後。既行淘汰。至奉文截取之時。是否再加考驗。又稱拔貢副榜似應一體考驗等語。是晏斯盛尚未領會朕務在得人之旨。但於細微之處沾沾奏請。且此旨未曾頒布各省。恐不知者尚多。今應通行宣諭一體遵奉。查上年有每次鄉試後。令督撫學政驗看大加淘汰一條。昨甲子鄉試後。已舉行一次。其實在老邁龍鍾者。業已去其大半。嗣後此例不必每科舉

行。候朕因時制宜。酌量降旨。其恩拔歲副及挨貢應用教職者。驗看之處。仍照舊例行。至該員臨選時。給發文憑到日。仍加考驗。必精力文藝足勝司教之職。方准領憑到任。○十四年議准。嗣後教職六年俸滿。該督撫學政嚴加甄別。如果才具出眾。應行舉薦者。即行具題。其尋常供職之員。分別去留。俱出具切實考語具題請

旨。如有不應保留之員。濫行保留者。該督撫學政嚴加議處。○十五年議准。教職交代。不過書籍祭器學田等項。原非州縣可比。嗣後限一月完結。

○十六年議准。嗣後各學訓導新舊接卸。尚有專管之正教官在任。毋庸造冊交代。若止有訓導而無正教官之處。仍造冊交代。○又議准。嗣後教職一官。除俸滿保題仍照六年舊例外。其題留供職之員。定為三年澄汰。將實在年力就衰者即行汰退。咨部彙題。如遇計典之年。仍照例嚴加甄別。不得止將一二昏耄者附疏塞責。再各省學政。與教職最為親切。務於歲試後留心甄別。有年耄學荒不職者。即會同督撫勒令休致。○十八年

諭向例各省教職六年俸滿。該督撫學政公同甄別。堪膺薦舉者。保題送部引見。年力衰邁者。咨部休致。但督撫陋習。既不肯輕薦舉。亦不肯多咨退。是以保題者固屬寥寥。而休致者亦不多見。蓋視教職為無足重輕。初不計其為造士之根本也。前以選拔貢生為教職之階。曾諭督撫學政令其加意慎重。嗣後教職除有劣蹟者。隨時叅劾外。至六年俸滿。堪膺民社者。保題。其年力未衰。可以留任者。出具考語。送部引見。如准留任。俟後六年再滿。仍如是甄別。年老之員。即咨部休致。有願來京引見者。照大計之例。該督撫聲

明給咨引見。至訓導例止得升縣佐。該上司尤多忽略。嗣後甄別之例。與各教職同。著為令。○十九年議准。凡在百里以外之府學生員。令州縣學嚴加約束。其有不法重情。勢難緩待者。訪查的實。即行牒明州縣。仍移知府學辦理。不得謂非本學專責。因循推諉。儻有前項情弊。察出。照例題參議處。○二十年題准。嗣後教官交代清楚。改為按季造報。其中或有交代遲延。以及缺少樂器等項。仍令單咨報部辦理。○二十二年定。雲貴川廣福建湖南甘肅等省教職。改為八年一次。

甄別保題。至來京亦不必專檄獨行。聽其從便
結侶請咨送部引

見。餘近省分照舊例行。○二十三年議准。嗣後各省
學臣考試教職時。兼用律詩一首。總權其學行
事蹟文章。以定黜陟。○二十六年議准。教官所
轄。止係文武生員。如生員遇有事犯未經查出
詳報者。照例叅處。至教官無約束貢監之責。嗣
後捐納貢監。有窩竊唆訟貪玩不法等情。將不
查出申報之州縣議處。毋庸將教官查叅。○二
十八年議准。直省府學生員在百里以外者。照

例令附近州縣學教官代理月課。如遇舉報優劣。本籍教官聞見既確。密行開單移交府學轉申。如有失察。分別處分。其武生亦照文生員一例辦理。○二十九年議准。嗣後教官缺出。無論暫署委署。督撫均咨明學臣。該員仍將到任日期。申報學臣備案。○三十一年

諭吏部甄別教職佐雜。兵部之千總。定以六年俸滿分別保薦留任勒休。並令各督撫於年終彙奏。原恐督撫等或曲意姑容。致有哀庸戀棧。是以批令該部知道。以便比較查覈。若一概存而不論。則亦毋庸批交

該部矣。蓋此等甄別年滿員升。其列入保薦者。合例與否。俱由部覈議請旨。惟例應留任之員。該部止照督撫等所議存案。向未復加察覈。但各員升分別留任。初次定以六年。迨下次再行甄別。前後已逾十餘年之久。其中豈無衰庸龍鍾年歲已逾定例之人。若該督撫等或因循姑息。不行裁汰。該部又以向無查覈之責。聽其蒙混濫竽。殊非覈實官方之道。嗣後著各該部遇有此等照例彙奏事件。及一切督撫等題奏。經朕批交該部知道者。將應否駁准之處。俱於年終詳查覈議具奏。三十三年

諭前據布政司張逢堯條奏。請將各省歲貢生應用教職人員。無論已未截取。每逢鄉試之後。即行驗看。淘汰。經該部議駁。以貢生選授發憑。自有考驗之例。毋庸每科豫為甄別。降旨允行。第念督撫等臨期考驗。積習因循。既不免徒成具文。而該員等年齒就衰。憚於赴驗。或部選已久。尚未蒞任。致諸生督課廢弛。於學校殊有關係。嗣後督撫考驗。務須詳慎甄別。不得稍事姑容。其新選之員。有遲逾定限久不到任者。即照例嚴叅。開缺另選。至教職遇有懸缺。向來率委別學教官代理。此等司鐸微員。兩任豈能兼顧。現在各

省有挑選二等舉人在籍候選教職之員。伊等得缺尚遲。如有情願及時自效者。即赴本省督撫處報明。遇有缺出需人。聽候該督撫會同學政挨次派委暫署。則員缺既不至久懸。而需次者亦不令閒曠。自為一舉兩得。該部即遵諭行。○又

諭各省甄別教職佐雜及千總等員六年俸滿各摺。前經諭令吏兵二部。於年終覈較彙奏一次。但各省地方大小不等。額設員弁多寡不同。其在地狹員少之省。每年酌量甄別一二員。即不得謂之姑息。若大省員數衆多。而其甄別褫退者。不過略舉數人塞責。即

較之小省為數稍多。而統計該省員額。所去尚不及百之二三。且並有全行留任者。勢必致衰頹庸劣之員。姑容戀棧。而年壯應用者。反阻升進之路。豈覈實澄敘之道。嗣後吏兵二部於彙奏時。各按省分大小屬員多少。覈其去留之數。列單呈覽。並統覈三年內。該督撫有無全未甄別及甄別過少之處。一併奏聞。則各督撫之是否實力察覈。抑或寬徇沽名。底裏皆可立見。著為令。○三十八年議准。嗣後各省教職。凡病痊終養。以及丁憂起服人員。有情願自效者。皆可赴省呈明。聽候該督撫委用。遇有缺出。先

委二等舉人。再委候補教職。○五十二年奉

旨。吏部奏上年福建省甄別教職。覈之額缺數目。不及百之二三。請將該督撫學政照例議處。但念該督撫均有承辦兵差及料理軍餉等事。此次無暇甄別教職。未能照例覈辦。尚屬有因。李侍堯徐嗣曾著從寬免其交部。至該學政陸錫熊。考覈教職。是其專責。軍務又非其承辦。乃甄別不及百之二三。咎實難辭。陸錫熊著交部議處。○五十七年

諭。據吳省蘭奏。准督臣梁肯堂咨送年滿保薦甄別鈔疏。令學政衙門備案。內有保薦教職二員。李德輿止

見過一次。吳士升並未見過。因業經具題。咨商無及。已咨會梁肯堂行司調送補驗等語。各省教職。係學政專管。其保薦堪膺民社之員。升任知縣後。如才具平常。不能勝任。原保之學政。定例處分綦嚴。各省保薦教職時。自應與學臣會商。擇其才具優長者會銜保題。今梁肯堂所保教職二員。並未先與學政酌商。於會銜具題後。始行鈔疏知照備案。殊非慎重保薦之道。竟係梁肯堂不以學政為事。率臆徑行。國家簡任學政。豈不竟同虛設乎。梁肯堂著嚴飭行。此後遇有甄別保薦教職等事。均應照例會同學政先行酌

商。秉公辦理。聯銜具題。毋庸仍前徑行專辦。以符體制。至各省督撫。若於保薦甄別地方官員。亦有似此並不彼此會商。輒以一人專主。即會銜具題者。一經發覺。朕必重治其罪。○嘉慶十九年議准。學政考覈教職。原有專條。嗣後各省學政。務須隨時察勘。鑒別賢否。嚴行稽覈。不得視為具文。至應去應留人員。咨明督撫隨時叅劾。其三年舉劾。照例彙題。○二十二年

諭御史周鳴鑾奏請整飭學校一摺。直省各府州縣。建置學校。官以教諭訓導為名。原令其訓誨士子。宣揚

教化。如該御史所奏。各省教官。廢棄職業。懶於月課。殊失慎選師資之義。著該督撫學政等。於所屬教官。時加考覈。令各勤修職事。以明倫講學為士子倡率。如有學品庸陋之人。濫竽充數者。立即斥退。以勵師儒而端教術。○道光二年

諭。御史趙柄奏。請慎覈改教。以重學校一摺。所奏是。國家教化之興。由於勸學。各省教職。得品端學裕之員。盡心化導。於士習民風。均有裨益。近日各省甄別州縣。凡才具平庸。不諳吏治。年力就衰。各員率請改教。此等衰庸之員。即令其司鐸。安望實心化導。克稱厥

職乎。嗣後各直省督撫。如才不勝任之知縣。如未經得缺。將該員品學尚堪秉鐸之處。切實聲明。仍酌量奏請改教。其實缺人員。如履任在半年外者。才不勝任。即概予休致。不得因其正途出身。率請改教。該督撫務各秉公甄別。尤不得因有此旨。將闕冗各員。一味姑容。轉致貽誤地方也。○三年

諭。禮部議覆河南學政吳慈鶴奏。酌改管束撥府生員章程。著照所議。嗣後各直省撥入府學生員。除由附郭州縣撥入者。仍歸府學管束外。其餘無論里數遠近。即令本州縣學嚴加管束。該府學教官。仍一體查

察。不得藉詞推諉。儻有徇縱情弊。將該教官等一體查叅。其歲科考試幫補出貢等項。仍歸府學辦理。○

六年

諭。御史何輝綬奏。教官不准干預地方公事一摺。據稱上年安徽巡撫張師誠奏。代理巢縣知縣萬年瀉一案。稱係密札教官查稟。與體制未協。各省州縣。責成督撫兩司道府。層層稽察。若待教職等官查稟。始行覈辦。該管上司。所司何事。且恐不肖屬員。藉端挾制。尤非政體。著通諭各督撫。一秉大公。隨時自行查訪。毋使教職干預公事。固不可意存姑息。博寬大之

虛名。尤不得假手末僚。啟傾陷之流弊也。○十七年
諭御史巫宜禊奏振興學校一摺。直省儒學之設。所以
教學造士。培植人材。立法極為周備。若如該御史所
奏。近來教官。大率不能振作。竟干預地方公事。劣生
秀士。因之效尤。以致包抗錢糧。起滅詞訟。士風人才。
日益汙下。尚復成何政體。著直省督撫學政。嚴加整
頓。通飭教官。務當敬教勸學。毋負乃職。其不能砥礪
士節。扶持名教者。即行嚴叅懲辦。○十九年

諭鄧廷楨等奏議覆御史焦友麟廣敷文教一摺。著仍
循照舊章。實力奉行。至該督等奏請查禁生員教官

吸食鴉片等語。現當查辦鴉片喫緊之時。若教官身自吸食。何以模範諸生。士子未盡肅清。編氓何由觀感。著該督等嚴飭所屬認真查禁。遇有教官生員吸食之案。按照現行新例。嚴行懲辦。通飭各省督撫一體遵行。三十年

諭。學校為教化之原。士子訓課。責在教官。教官賢否。責在學政。近日教官一途。半皆年老衰庸。及末學淺見之士。著各省學政。嚴行考校。文行兼優者。方准列薦。庸劣不職者。即行甄別。至於月課歲考。尤須認真舉行。所課試卷。按季申送學政。諸生優劣學冊。三歲咨

部備查。總期實力奉行。毋得日久生懈。咸豐十年諭。江蘇學政孫葆元奏請責成教官提調襄理考試一摺。各省設立教官。原以整飭學規。訓迪諸生。俾安分敦品。以圖上進。若如該學政所奏。江蘇生監多有不安本分。包漕抗糧。種種惡習。教官並不能稽查約束。此等庸懦之員。何以整頓學校。嗣後各屬生監滋事。教官不能認真約束。即著該學政指名嚴參懲辦。

同治元年

諭。自來儲才養士。必視學校為盛衰。我朝列聖相承。庠序修明。敦崇實學。

皇考文宗顯皇帝御極之初。即命生童就試者。兼習性理等書。原冀其趨嚮一端。則學術自正。乃近來各省教職等官。並不實力奉行。認真訓課。惟知索取贅禮。脩儀。貪得無厭。又其甚者。往往干預地方公事。並或遇事魚肉士子。諂諛紳富。又安望其經明行修。足為士林表率耶。嗣後各省學政。務當整躬率屬。督飭各教官。讀書立品。毋為士子所輕。平時訓導諸生。總以躬行實踐為歸。毋崇尚浮華。毋虛應故事。其稱職者。准各學政會同督撫保奏。給予獎勵。如闕冗充數。及少年浮動不克舉職者。並著隨時甄劾。不必待至大

計年分。庶人知自愛。爭自濯磨。正學昌明。人才蔚起。實有厚望焉。○七年奏准。嗣後增生附生。無論著有何項勞績。止准保佐雜。概不准保舉教職。各省學政。於案臨考試時。將各學現任教官。留心察看。認真考試。並諄諭勤加訓課。常與士子講求義理。其學業淺薄衰老戀棧者。會同督撫隨時嚴加甄別。不許姑容。仍於任滿時。將合省教官。是否均堪司鐸之處。專摺奏明。並咨部存記。以憑查覈。○光緒三年

諭廣東學政吳寶恕奏廣東考試槍冒甚多。各屬廩

保並不遵例挨派。不肖廩保朋比為姦。槍手遂肆行無忌。請嚴定教官處分等語。所陳考試情弊。恐不獨廣東為然。著各省學政嚴密稽察。認真整飭。至該教官。或不能約束。或甘受欺蒙。甚至有扶同作弊情事。著該部嚴定處分。欽此。遵

旨議准。嗣後各處童生考試。廩保不遵定例挨派。該教官不能約束者。照科場諸生不遵約束紊亂場規。該教官降一級調用公罪例。降一級調用。如因廩保不遵例挨派。以致槍冒肆行。該教官甘受欺蒙者。降二級調用。扶同作弊者。革職。俱

私罪。該學政不行揭叅。係失察者。罰俸一年。公罪。知情故縱者。照徇庇例。降三級調用。○六年議定。嗣後生員報捐選缺。學冊中即以捐納開除。不得將該生斥革。○八年

諭。御史謝謙亨奏。闕省教官。於歲科兩試。新進童生。勒索威嚇陵辱。各生補廩充貢。選拔舉優。均須議明規費。並於諸生戶婚詞訟。輒行羈押需索。請飭查禁等語。教官勒索規禮。干預詞訟。例禁甚嚴。若如所奏。殊屬不成事體。著該督撫會同學政。嚴行禁止。此等積弊。他省恐亦不免。並著各直省督撫

學政申明例禁。加意訪查。如有前項弊端。即將該
教官嚴行叅辦。以肅功令。